

AKASHVANI AIZAWL

REGIONAL NEWS BULLETIN

HEADLINES (EVENING)

- Rampum nawrhna General Strike zawm ve in Joint council of Mizoram Rural Bank Union chuan vawiin khan Aizawlah MRB thawktu ten lungawilohna an lantir.
- Hnahthial bialtu MLA Pu Jeje Lalpekhlua’n Hnahthial District in SDG (2023 atanga 2024) inkarah District ti tha ber nihna a hauh chu Vikshit Bharat atana kawng pawimawh tak ani a ti.
- Prime Minister Narendra Modia chuan vawiin khan Namibia khawpui Windhoek a thleng
- Khawvela firfiakte sum chetvel dan chhuitu Financial Action Task Force (FATF) chuan India a firfiaka chetna ah khan e-commerce te chu hmanraw lakkhawm nan hman anih thu an sawi.



MRB STRIKE

Central Trade Union in rampum huapa nawrh a huaihawt, General Strike chu Joint council of Mizoram Rural Bank Union chuan zawm ve in, vawiin khan MRB Head Office, MINECO- kawtah MRB thawktu 150 chuang an kalkhawm.

Vawiin chawhma dar 10 leh a chanve khan Mizoram Rural Bank Head Office, MINECO kawtah MRB branch hrang hranga thawktu 150 chuang te chu sorkar laipuiin Labour Codes pali a siam te duh lohna lantirna leh Regional Rural Banks (RRB) anga thil phut 5 te lantir nan an pungkhawm a. Mizoram Rural Bank Officers’ Association (MRBOA) President Pu Lalrindika Fanai chuan an nawrh chhan chu All India Regional Rural Bank Employess Associtation (AIRRBEA) te nawrhna chauh ni lovin, India ram puma hnathawk mi nuai tel te nawrhna a ni tih sawiin, he nawrhnaah hian Bank-a thawkte pawhin an lungawi lohna leh an

dukhawp lohna te an tel ve tih a sawi a, chung zingah chuan Labour Code pali thar an hman chu nawrh huaihawttute duh loh ber a nih thu a sawi a ni.

Bank hnathawktute intelkhawm, AIRRBEA chuan thil phut 5 an nei a, chungte chu mimal kutah regional bank hlan (privatisation) an duh lo a, National Rural Bank of India hminga regional bank hrang hrang khaikhawmtu apex body siam an duh a, a nghet loa hna hrang hrang thawk dah ngheh leh tun dinhmuna hna ruak awm mek hnawhkhah te an duh a, hei bakah hian New Pension Scheme ti bo a, Old Pension Scheme (OPS) hman leh an phut bawk a ni. MRB thawktute chuan an thil phutte hi an aupui a ni.

Protest SFX



NASHA MukT BHARAT ABHIYAN

Social Welfare Department Director Dr. Lalhriatzuali Ralte chuan thalaite nunphung dik an zir theihna bul chu chhungkua ani tih sawiin ruihhlo do kawngah kohhran leh pawl hrang hrang nen tanrual a pawimawh thu a sawi.

Akashvani Regional News Unit, Aizawl-in sorkar laipuiin ram pum huapa ruihhlo do beihpui a thlakna, Nasha MukT Bharat Abhiyan hnuaia Mizorama hmalakna chungchanga Social Welfare Director Dr. Lalhriatzuali leh CYMA General Secretary Dr Malsawmliana te a kawmnaah he thu hi a sawi a, Dr Lalhriatzuali Ralte chuan Mizoramin a mamawh chu ruihhlo ngaiten an sim theihna tur, De-addiction centre bakah hemi hnua anmahni enkawl zuina tur, after care rehabilitation niin a lang a ti a, Social Welfare Department chuan chhungkua atanga bultun a pawimawh hle a an hriat avangin kohhran leh pawl hrang hrang te nen thawk hova, hmalak an tum a, ruahmanna pawh mumal taka an siam thu a sawi bawk.

Central YMA General Secretary Dr Malsawmliana chuan Central YMA inn ruihhlo ti khawlaia riak thin te chu Home hrang hrangah te an dah thin tih sawiin, TBCC, Sakawrtuichhun leh OKM, Phunchawng te chu an dah tam berna te an nih thu a sawi a, heng home te hian rawngbawlna a ngaiin, a leng zat aia tam an lo dawngsawng thin a, mutna indaih loh chang te a thleng fo thin a ti a. Sorkar leh mimal bakah hian Mizorama Kohhran liante chu hemi chungchanga hmala thei ber turah a ngai tih sawiin kohhran hrang hrang ten rescue centre an neih sa te aia lian zawk siam thei se tha a tih thu a sawi bawk.



MIZORAM HIGHEST IN SDG

Hnahthial bialtu MLA Pu Jeje Lalpekhlua’n Hnahthial District in Sustainable Development Goals (SDG) (2023 atanga 2024) inkarah District ti tha ber nihna a hauh chu lawmawm atih thu sawiin India in kum 2047-a ram hmasawn nih a tumna atana kawng pawimawh tak anih thu a sawi.

Pu Jeje Lalpekhlua chuan Hnahthial District tanrualna leh mipui thawhrimna ramchhunga hriat hlawha a awm chu lawmawm atih thu sawiin an hlawhtlinna chuan hmasawn zel bakah phurna tam tak a pe tih sawiin India in kum 2047-a ram hmasawn anih tumna atan kawng pawimawh tak ani tih a sawi.

Byte: Jeje Lalpekhlua

NITI Aayog-in hmarchhak biala District Sustainable Development Goals (SDG) Index report (2023-24) thawhnhnihna a tihchhuahah Hnahthial district chu pakhatna a ni a, District ti tha zual 10 zingah hian Mizoram atangin Champhai chu pahnihna niin Kolasib chu pakuana a ni bawk a. Mizoram, Sikkim leh Tripura te chuan hmahruaitu Front Runner Status an kai pha tawh a. Heng state pathumte hian Aspirant category awm district an nei tawh lo a. DSDG Index report ah hian Northeast Region-a district 121 dinhmun tarlan a ni.



LUNGLEI RAIN HAVOC

Lunglei, Sethlun atanga Theiriat panna kawngchung, hun engemawti chen atanga lei nasa taka khi chu vawiin chawhma dar 10:00 vel khan a min a, leimin vang hian kawng meter 10 vel a bal tel.

Hei vang hian he kawngah hian lirthei engchi mah a kal thei lo nghal a, a hnuai kawngpui National Highway pawh chhilhin tun dinhmunah Lunglei leh Hrangchalkawn inkar chu a ping ta rih a ni. Helai kawng hi NHIDCL ten kawngpui laih zau hna an thawh mekna a ni. He kawng hi Lunglei lam atanga Hnahthial te, Lawngtlai leh Siaha lam panna kawngpui niin kawng pawimawh tak a ni.

Lungleia kan corr sawi danin, Hrangchalkawn leh Theiriat inkar hi Company lam hian an laih mek niin a nal in chirh a tam hle a, lirthei eng chi tan pawh kal harsa a ni a, LMC huam chhung a mi, Zobawk, Lungpuizawl leh Hrangchalkawn lam tan chuan Lunglei kal pawh a harsa in hun engemaw kalta atang khan Theiriat Local Council leh NGO hrang hrang te bakah Dist Administration lam atang pawhin hnathawk chak deuh tur in Company lam hi an lo nawr tawh thin a, a sawtna hmuh tur erawh a awm hran lo a ni.

(Thanghmingliana Renthlei Lunglei PTC)



Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.
<><><>

PM

Prime Minister Narendra Modia chuan vawiin khan Namibia khawpui Windhoek a thleng a. Namibia President Netumbo Nandi-Ndaitwah nen zanin hian an inkawm ang. Pu Modia hi kum 30 hnua India Prime Minister zinga Namibia tlawh hmasa ber a ni a. Windhoek-a Hosea Kutako International Airport ah ropui taka lo hmuah a ni.

Namibia a pan hma hian Prime Minister Narendra Modia hi Brazil sawrkarin civil chawimawina a pek theih sang Grand Collar of the National Order of the Southern Cross nizan khan hlan a ni bawk a. India leh Brazil inkara thawhdunna ti nghet tur leh inlaichinna tha siam tura a thawhhlawk em avangin he award hi Brazil President Lula Dasila chuan PM Modia hnenah hian a hlan a ni.

(Newsonair)

<><><>

TERROR FUNDING

Khawvela firfiakte sum chetvel dan chhuitu Financial Action Task Force (FATF) chuan India a firfiaka chetna ah khan e-commerce te chu hmanraw lakkhawm nan hman anih thu an sawi. Jammu and Kashmir-a Pulwama leh Uttar Pradesh-a Gorakhnath Temple firfiakten an beihnaah khan internet-a sumdawnna e-Commerce te chu an hmanrualak nan an hmang tih FATF chuan a puang a. Firfiakte sum chet vel nan hian social media, message thawnna apps hrang hrang leh internet site thenkhatte chu hman anih thu FATF chuan a sawilang bawk a ni.

(Newsonair)

<><><>